

## దెస్సలోనీయుల్క రెగిడ్లి దొన్నిచి ఉత్త్రమ్ బారిక్ జలో పవులు దెస్సలోనీక పట్టుమ్చ సంగుమ్చక రెగిడ్లి దొన్నిచి ఉత్త్రమ్

మొదోల్ కోడు

<sup>1</sup> అమ్క అబ్బొ జలో దేముడుక చి ప్రబు జలో యేసుక్రీస్తుక నంపజా జోచి తెడి తిల దెస్సలోనీక పట్టుమ్చ సంగుమ్చక \*సిల్వానన్ చి తిమోతి, పవులు రెగిడ్లి ఉత్త్రమ్.

<sup>2</sup> దేముడు అబ్బొసేచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

<sup>3</sup> తుమ్చి నముకుమ్ అన్నె ఒగ్గర్ జా గెతయ్, చి తుమ్ ఎత్కిజన్ ఎక్కిలోక ఎక్కిలో రోజుక అన్నె ఒగ్గర్ ప్రేమ కెర్తసుచి రిసా, దేముడుక అమ్చి సర్ద నే సంగిలె నెంజె. తుమ్చి రిసా రోజుక అమ్చి సర్ద జోవయింక సంగితసుమ్. <sup>4</sup> అన్నె ప్రబుక విరోదుమ్ జలస, తుమ్క ఒగ్గర్ అల్లర్ కెర్తె తిలె కి, తుమ్ కిచ్చొ కిచ్చొ ఒగ్గర్ బాదల్ సేడ్డె తిలె కి, తుమ్ నిదానుమ్ తా ఒర్పుప జతసు, చి తుమ్చి నముకుమ్ పిట్టె నాయ్. జాకయ్ దేముడుచ కేన్ సంగుమ్లుతె గెలె జవున్, కబుర్ తెద్రయ్లె జవున్, తుమ్చి రిసాయి దయిరిమ్ తెన్ అమ్చి సర్ద అన్నె నంపజులసక అమ్ సంగితసుమ్.

<sup>5</sup> జోచి రాజిమ్తె తుమ్ బెదిల్ రిసా తుమ్ †అల్లర్ సేడుక మెన దేముడు తుమ్క విలువ మెలి రితి దెక అస్సె. 'దస్సి తీర్పు కెర అస్సె' మెన, అన్నె జా తీర్పుక 'సత్తిమ్చి' మెన కిచ్చొతె రుజ్జు జతయ్

\* **1:1** 1:1 నెంజెలె 'సిలయు' బారికుల్ 15:22, 16:19, 17:4, పడ్డి కొరిందిల్క రెగిడ్లి 2 నంబర్ ఉత్త్రమ్ 1:19, చి పేతురు రెగిడ్లి 1 నంబర్ ఉత్త్రమ్ 5:12 దెక. † **1:5** 1:5 బారికుల్ 5:41క దెకిలె, జోవయించి నాన్ జోవయించి కామ్చి రిసా, అమ్ అల్లర్ బాదల్ సేడుక జో సెలవ్ దిలె కిచ్చొ రుజ్జు దెకయ్తయ్ మెలె, జోవయింకెన్ బెదుక జో అమ్క విలువ మెలి రితి దెకిలిసి.

మెలె, తుమ్ ఈంజేవ్ బాదల్ ఒరుప్ప జా నిదానుమ్ తిలిన్తెయి రుజ్జు జతయ్; †జోచి రాజిమ్తె తుమ్ బెదిల్ రిసా తుమ్ జేవ్ అల్లర్ సేడ్డను.

<sup>6</sup> దేముడు సత్తిమ్ తీర్పు కెర్తొసా జలిన్చి రుజ్జు కిచ్చొతె డిస్తయ్ మెలె, తుమ్క అల్లర్ కెర్తసక జో సిచ్చ కెరెదె. <sup>7</sup> చి జోచి కామ్క బాదల్ సేడ అమ్ ఎత్తిజిన్క జో సుక్కుమ్ దెతి పొదిక తూమ్ కి దస బాదల్ సేడ్లసక కి జా సుక్కుమ్ దెయెదె. కెయఁక మెలె, ప్రబు జలో యేసు కి జోచి అదికారుమ్ దెకయ్త పరలోకుమ్చ దూతల్ తెన్, సుట్టునంత ఆగి లగితి రితి జా జో ఉత్ర జా జోవయించి గవురుమ్ రుజ్జు జతి పొదిక ఈంజ ఎత్తి జర్గు జయెదె. <sup>8</sup> చి దేముడుక నేన్లసక, ప్రబు జలో అమ్చొ యేసుచి సుబుమ్ కబుర్ రితి నే కెర్లసక సిచ్చ కెరెదె. <sup>9</sup> జోవయించి సిచ్చ కిచ్చొ మెలె, \* నాసెనుమ్తె గెచ్చు నాసెనుమ్తెయి కెయఁక తెయఁక తాఁ గెచ్చుల, చి ప్రబుతె జేవ్ గెచ్చుక నెత్తిర్తి, జోవయించి ఒగ్గర్ సెక్తిచి రిసాచి జోచి ఒగ్గర్ ఉజిడిచి రిసా జేవ్ జోవయింక దెకుక నెత్తిర్తి. <sup>10</sup> జా కెయఁక జర్గు జయెదె మెలె, జో అన్నె ఉత్ర జెతికయ్ దీసిక. జో జెతిసి కిచ్చొచి రిసా మెలె, జోక నంపజా జోచి సుద్ది జా జోచయ్ జలస జో తెన్ బెద గవురుమ్ జతిన్తె గవురుమ్ జతి రిసా, చి జేవ్ జోక దెక ఆచారిమ్ చి నర్ల జతి రిసా. జోచి రిసా అమ్ తుమ్క సంగిలి సాచి తుమ్ నంపజలదు, చి తూమ్ కి ఒత్త బెదితె.

### దెస్సలొసికచ పవులింసి ప్రార్దన కెర్లిసి

<sup>11</sup> జెంక తుమ్చి రిసా రోజుక ప్రార్దన కెర్తసుమ్. కిచ్చొ మెన మెలె, తుమ్ జోచయ్ జా, జోచి పరలోకుమ్చి రాజిమ్తె తుమ్ బెదుక మెన దేముడు తుమ్క బుకార అస్సె, చి జో తుమ్క బుకార్లి కెర్లిన్క

† **1:5** 1:5 నెంజిలె, 'అన్నె తుమ్ పరలోకుమ్తె గెతెచి రిసా మదెనె ఈంజేవ్ బాదల్ వాట్ తుమ్క అత్తుక డిట్టుమ్ పూర్తి కెర తెయార్ కెర్తయ్.' యాకోబు 1:2-4 దెక. § **1:7** 1:7 నెంజిలె 'జోవయించ ఒగ్గర్ సెక్తిచ పరలోకుమ్చ దూతల్ తెన్ ఉత్ర జా....' \* **1:9** 1:9 నెంజిలె, 'మొర్నుతె'. మెలె, అత్తుమొర్నుతె, ఆకర్చి మొర్నుతె. డీనయ్లిసి 2:11, 20:6, 20:14, 21:8.

తుమ్ విలువ జతి రితి కెర్పు. తుమ్ ఉచర్లి కేన్ చెంగిల్ కామ్ కి, తుమ్చి నముకుమ్చి రిసాచి ఎత్కి కామ్ కి జోవయించి ఆత్మసెక్కిక జెయ్యిమి కెర్పు. <sup>12</sup> తుమ్ ఇండితినతె అమ్చొ ప్రబు జలో యేసుచి నావ్ గవురుమ్ జయెదె, జోవయించి తెడి తూమ్ కి గవురుమ్ జస్తె. దేముడుచి ప్రబు జలో యేసుక్రీస్తుచి దయయ్ ఈంజ ఎత్కి జర్గు జతి రిసా ప్రార్దన కెర్దనుమ్.

## 2

<sup>1</sup> బావుడ్లు, అమ్చొ ప్రబు జలో యేసుక్రీస్తు అన్నె ఉత్ర జెతినచి రిసా, జోక నంపజలన ఎత్కిజిన్ జోతె గెచ్చ జోతెన్ ఎక్కితె బెదితినచి రిసా, తుమ్క ఆవ్ కిచ్చొ మెన అప్పె బతిమాల్ప జా సంగితసి మెలె, <sup>2</sup> జా దీసి నే జెతె అగ్గె, అబద్దుమ్క, “దీసి పావ అయ్లి గె. సిప్ప దెకిలయ్, ప్రబుచి కోడు, ఈంజ” మెన కో జవున్ కిచ్చొ జవున్ ఆత్మచి సెక్కిక సంగిలె, నెంజిలె “దీసి పావ అయ్లి గె” మెన కేన్ జవున్ మాన్సు సొంత సెక్కిక ఉచర సంగిలె, నెంజిలె “దీసి పావ అయ్లి మెన అమ్చి తెన్ ఉత్తమ్తె అయ్లి” మెన కో జవున్ సంగిలె, తుమ్చి మెన్సు తుమ్ బమ్మ జా నాయ్, నంప కెర నాయ్. <sup>3</sup> కోయి దస కొడొ సంగిలె, తుమ్ మోసిమ్ సేడ నాయ్. కిచ్చొక మెలె, ప్రబు అన్నె జెతికయ్ జా దీసి నే జెతె అగ్గె, తొలితొ, ఒండి లోకుమ్చ ఎతివాట్జిన్ మాన్సుల్ దేముడుక విరోదుమ్ జతి వెల్లి బాద జర్గు జంక అస్సె. దేముడు సంగిలిన్ ఎత్కిక విరోదుమ్ జలో \*పూర్తి వెల్లి మూర్కుమ్ బుద్ది జలోసా ఈంజ లోకుమ్తె బార్ జంక అస్సె, జో పూర్తి నాసెనుమ్ జా గెత్తోసా.

<sup>4</sup> జో వెల్లో మూర్కుడు కిసి జయెదె మెలె, కేన్ దేముడు మెలోసొక కి కేన్ జొకర్తి వస్తువక కి జో విరోదుమ్ కెర, “ఆవ్ వెల్లో” మెనన, దేముడుచి గుడితెచి ముక్కిమ్ జలి టాన్తె వెస కెర, “ఆవ్

\* **2:3** 2:3 డీసయ్లిన్చి పుస్తకుమ్తె దసా మాన్సుచి రిసాచ కొడొతె ‘జంతు’ మెన టాలి తెన్ సంగితయ్. డీసయ్లిసి 12:9, చి 13 అద్యయిమ్ తెంతొ 17 అద్యయిమ్ ఎద, చి 19, 20 అద్యయల్ దెక.

దేముడు” మెనన సంగెదె. <sup>5</sup> తుమ్చి తెన్ ఆవ్ తిలి పొది కి తుమ్క ఈంజ ఎత్తి సంగెలయ్. ఏద కెర్న నాయ్ గె?

<sup>6</sup> జలె, దేముడు సెలవ్ దిలి కాలుమ్కయ్ జో మూర్కుడు బార్ జంక జయెదె. గని అప్పె నే బార్ జంక కిచ్చొ అడ్డు తయెదె గే తుమ్ జాన్సు. <sup>7</sup> మదెనె జో మూర్కుడుచి బుద్ది ఈంజ లోకుమ్తె జేవ్చి పాపుమ్ లుంక, చోరు తిరీమ్ తిరీమ్ కెర్తయ్, గని జోక అడ్డు కెర్తొసా అడ్డు కెరుక ములిలెకయ్, జా బాద ఎదార్డుమ్ జా పూర్తి అల్లర్ కెరెదె. <sup>8</sup> తెదొడకయ్ జో మూర్కుడు బార్ జా జోవయించి కామ్ ఎదార్డుమ్ కెరెదె. గని ప్రబు జలో యేసు అన్నె ఉత్త్ర జా డీస్టిన్కయ్ జోయ్యి జో మూర్కుడుచి సెక్తి గెచ్చవయ్ గెలెదె. చి రితి జోచి చోడి తెంతో జెతికయ్ †వాదుకయ్ జోవయింక మారయ్ గెలెదె.

<sup>9</sup> జో మూర్కుడు జలొసా కేనె తెంతో జా తయెదె మెలె, సయ్తాన్చి సెక్తి తెంతో బార్ జా తయెదె. అయ్లె, జో సయ్తాన్చి ఒగ్గర్ సెక్తి తెన్ అబద్దుమ్చ ‡మాయల్ జత వెల్లొ వెల్లొ కమొ గట్టిజ కెర కెర, <sup>10</sup> నాసెనమ్తె గెచ్చుక తిలసక మోసిమ్ కెరెదె. కిచ్చొక మెలె, సత్తిమ్ తిలిసి జేవ్ ప్రేమ కెరుక నెసిలచి రిసా రచ్చన జతి నాయ్. <sup>11</sup> సత్తిమ్ జేవ్ నెసిలి రిసా, ‘అబద్దుమ్, జలె, నంప కెర్త’ మెన, ‘జేవ్ ఆత్మ గుడ్డి జతి రితి జా మోసిమ్తె దెర్ను సేడ్డు’ మెన దేముడు సార్ప కెర తయెదె. <sup>12</sup> దస్సి, కో సత్తిమ్ నంప కెర్తి నాయ్, గని పాపుమ్క ఆస జవుల గే, సిచ్చతె గెచ్చుల.

### ప్రబుక నంపజలన రచ్చనతె గెతిన్చి

<sup>13</sup> ప్రబు ప్రేమ కెర్త ఓ బావుడ్లు, తుమ్చి రిసా దేముడుక అమ్చి సర్ద నే సంగెలె నెంజె. రోజుక తుమ్చి రిసా జోవయింక అమ్చి

† **2:8** 2:8 నెంజలె ‘కోడుక’. డీసయ్లిన్ 19:21తె సయ్తాన్చి సేవ కెర్తె తిలసచ సయ్స్యముల్క ప్రబు జోవయించి చోడితెచి కడ్డుమ్క మారెదె. జా కండా జోవయించి కోడుకయ్ టాలి జతయ్. ఇన్నె కోడుచి అర్దుమ్ కి ఉచరుక జయెదె. ‡ **2:9** 2:9 డీసయ్లిన్ 12:9, చి 13 అద్యయిమ్ దెక. 13:13తె మాయచ వెల్లొ వెల్లొ కమొచి కోడు అస్సె.

సర్ద సంగితసుమ్. కిచ్చొక మెలె, కీతుమ్ \*రచ్చించుప జంక మెన మొదొల్ తెంతో జో నిసాన్లన్. కీసి రచ్చించుప జంక మెలె, తుమ్ జోవయించయ్ జతి రితి జోవయించి సుద్ది తిలి ఆత్మ తుమ్క సుద్ది కెర్తి వాటు, చి సత్తిమ్ తుమ్ నంప కెర్తి వాటు. 14 ప్రబు జలో అమ్చొ యేసుచి గవురుమ్తె తుమ్ బెదితి రిసా, తుమ్ ఇసి సుద్ది జంక సత్తిమ్ నంప కెరుక మెన దేముడు తుమ్క బుకార్లన్. కేన్ వాటు బుకార్లన్ మెలె, అమ్ సుబుమ్ కబుర్ సూనయ్లి వాటు. 15 జాకయ్, బావుడ్లు, తుమ్ డిట్టుమ్ టీఱ, చి అమ్చి అత్తి దిలిసి ఎత్తి, మెలె, అమ్ ఒత్త తిలి పొది సికడ్డిసి కి ఇన్నె తెంతో ఉత్తుమ్ రెగ్గ సికడ్డిసి కి, తుమ్ డిట్టుమ్ దెరన, జయి రితి ఇండ.

### దెస్సలొసికచ రిసా పవులింసి ప్రార్దన

16 ప్రబు జలో అమ్చొ యేసుక్రీస్తు, అన్నె అమ్క అబ్బొ జలో దేముడు జోవయించి దయక అమ్క ప్రేమ తా, కెయఁక తెయఁక తిలి దయిరిమ్ దెతి పరలోకుమ్తె గెచ్చు జతి దయిరిమ్ కి అమ్ ఎత్తిజిన్క దా అన్తి. 17 జలె, 'తుమ్చి పెట్టి తుమ్క జోవయించి ఆత్మకచి దయిరిమ్ కెర్తె తా తుమ్ కెయఁక తెయఁక సత్తిమ్ ఇండితి రితి సత్తిమ్ లట్టబ్బి రితి తుమ్క డిట్టుమ్ నిదానుమ్ కెర్తె తత్తు' మెన అమ్ ప్రార్దన కెర్తసుమ్.

## 3

### అమ్చి రిసా కి ప్రార్దన కెర

1 పడ్డొ అన్నె కిచ్చొ మెలె, బావుడ్లు. ప్రబుచి సుబుమ్ కబుర్ తుమ్తె సూనయ్తికయ్ జా కీసి తుమ్తె పలితుమ్ దెర్లి గే, అమ్ ఇన్నె సుబుమ్ కబుర్ సూనయ్తిసి కి అడ్డు నెంతె జిన పలితుమ్

§ 2:13 2:13 నెంజిలె, ప్రబుక నంపజతన మొత్తుమ్తె తూమ్ నొవొ జతి రితి తొలితో నంపజంక మెనయ్ జో నిసాన్ల మెన ఈంజ ఎత్తి తొలితో రెగిడ్ల సగుమ్ పుస్తకల్తె అస్సె.

\* 2:13 2:13 మెలె, పాపుమ్తె తెంతో, జేవ్ కెర్ల పాపల్చి సిచ్చ తెంతో, చి నయ్తాన్చి రాజిమ్ తెంతో రచ్చించుప జంక.

దెర్తె తవున్ మెన అమ్చి రిసా తూమ్ ప్రార్దన కెర. <sup>2</sup> బుద్ది నెంజిల కుస్సిదుమ్చ మాన్సుల్ కెర్తె అల్లర్ తెంతో అమ్ రచ్చించుప జతి రితి తుమ్ ప్రార్దన కెర. సగుమ్జిన్ ప్రబుక నంప కెర్తి నాయ్, గెద.

<sup>3</sup> ప్రబు, నముకుమ్ జలోసా, చి తుమ్ ఆత్మక డిట్టుమ్ తతి రితి జో సెక్తి దెయెదె, చి సయ్తాన్ కెరయ్త అల్లర్ తుమ్క నే లయితి రితి జొయ్యి అడ్డు దెయెదె. <sup>4</sup> తుమ్చి రిసా 'అమ్ సంగిల్ రితి నిదానుమ్ కెర్తెతి, నిదానుమ్ కెర్తె తవుల' మెన ప్రబుచి తెడి దయిరిమ్ తెన్ అస్సుమ్. <sup>5</sup> జోవయించి ఇస్టుమ్ రితి తుమ్ కెర్తి రితి, దేముడుచి ప్రేమ క్రిస్తు పుత్తనచి నిదానుమ్, తుమ్చి పెట్టి ప్రబు దెవును.

### కామ్ కెర కెర జితిన్చి రిసా

<sup>6</sup> బావుడ్డు, ప్రబు జలో అమ్చొ యేసుక్రిస్తుచి నావ్ తెన్ తుమ్క కిచ్చొ ఆడ్ర దెతసుమ్ మెలె, ప్రబుక నంపజలో కేన్ బావొ కిచ్చొ కామ్ నే కెర్తె బద్దుకుమ్ జా జితయ్ గే, 'నిదానుమ్ తెన్ కామ్ కెర కెర జియ్' మెన అమ్ సంగిలిసి పిట్టవన్తయ్. దసాచొక తుమ్ దూరి తా.

<sup>7</sup> అమ్ కెర్తి రితి తుమ్ దెక సికిలె చెంగిలి మెన తుమ్ సొంత జాన్సు. తుమ్చి తెన్ అమ్ తిలి పొది బద్దుకుమ్ జము నాయ్. <sup>8</sup> చి డబ్బుల్ నే దెతె కచి అన్నిమ్ కమొ నాయ్, గని కక్క బోద నే కెర్తి రిసా, స్రెమ సేడ సేడ రాతి మెద్దెన \* సొంత కామ్ కెర కెరయ్ జితె తిలమ్. <sup>9</sup> జితిసి గట్ట తుమ్తె ఆరి నజుక జతి, చి అమ్చి కామ్చి రిసా, గని 'అమ్క దెక జేవ్ కి బుద్ది సిక్కుత్' మెన, దస్సి సొంత కామ్ కెర కెరయ్ జిలమ్.

<sup>10</sup> కిచ్చొక మెలె, "కో కామ్ కెరె నాయ్ గే, కవున్ కి నాయ్" మెన ఆడ్ర దిలమ్. <sup>11</sup> తుమ్క కిచ్చొక సంగితసుమ్ మెలె, తుమ్తె సగుమ్జిన్ బద్దుకుమ్ జా కామ్ నే కెర్తె, ఆరి బుల బుల వేర మాన్సుల్చి కామ్ పిట్టయ్తతి మెన సూన అస్సుమ్. <sup>12</sup> దస మాన్సుల్చి రిసా ప్రబు జలో యేసుక్రిస్తుచి నావ్ తెన్ కిచ్చొ ఆడ్ర దెతసుమ్, కిచ్చొ బతిమాల్పా జా సంగితసుమ్ మెలె, "బమ్మ నెంతె పూచి తెన్ తుమ్ సొంత కామ్

\* 3:8 3:8 పవులు టంబుగుడ్డల్ తున తెయార్ కెరెదె.

కెరనయి జియ” మెంతసుమ్. 13 బావుడ్లు, చెంగిల్ కామ్క జెతిసి ఎత్తి కెరుక తుమ్ బద్దుకుమ్ జా నాయ్.

14 ఈంజ ఉత్తమ్తె అమ్ సంగిల్ రితి కోకెరె నాయ్ గే, ‘జోవయింక బుద్ది జెతికయ్ రితి గడియ లాజ్ జవున్’ మెన, జో కొన్సొ గే తుమ్ దెక చి జోవయింక జా మదెనె తుమ్తె బెదవన నాయ్. 15 జోవయింక విరోదుమ్ దెక నాయ్, గని జోవయింక ‘క్రిస్తుచి తెడి బావొ జయెదె’ మెన, జోవయింక బుద్ది జెతె ఎదక జోవయించి పూచి జో కెర్తి రితి జోవయింక సికడ.

### ఆకర్చి ప్రార్థన

16 సేంతుమ్ దెతో ప్రబు సొంత తుమ్చి పెట్టి జోవయించి సేంతుమ్ పూర్తి దెతె తవున్. తుమ్ ఎత్తిజిన్క ప్రబు తోడు తవున్.

17 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్డసి. అంచి ఎత్తి ఉత్తమ్క ‘అంచి’ మెన ఆవ్ ఇసి రెగిడ్డిసి గుర్తు జవున్. అంచి రెగ్గుక ఇసి తయెదె.

18 అమ్చొ ప్రబు జలొ యేసుక్రిస్తుచి దయ తుమ్క ఎత్తిజిన్ తెన్ తవున్!

**Kupia New Testament**  
**Kupia: Kupia New Testament (New Testament)**

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files  
dated 29 Jan 2022

7ccb2690-4432-5e86-88c1-f8ee976f30f4